

## САХНА САҢЛАҒЫМЕН КЕЗДЕСУ



**А**кадемияның акті залында қазан айының 11 жұлдызы күні М.Әуезов атындағы академиялық драма театрының көркемдік жетекшісі және бас директоры, мемлекеттік сыйлықтың иегері Тұңғышбай Қадырұлы Жаманқұловпен шығармашылық кездесу өткізілді.

Академияның ректоры М.С.Нәрікбаев бастаған өнер

саңлағының сахнаға көтерілуін жиналған қауым қызу қол шапалақтап қарсы алды. Теледидарда, кинода, театр сахнасында сан-алуан кейіпкерлердің бейнелерін сомдаған, соңғы жылдары режиссура саласындағы өнермен танымал бола бастаған Тұңғышбай Жаманқұловты елімізде білмейтін жан кемде кем болар. Халық сүйген әртістің өнердегі алатын орны

болсын, жеке басының өмірі болсын көрерменді қызықтырары хақ. М. Әуезов атындағы академиялық драма театрының хал-жайы мен театр труппасының бүгінгі тыныс-тіршілігі, өзінің орындаған рольдері мен қойған спектакльдері жайында және өмір жолын қазақ-орыс тілдерінде еркін сөйлеп, асқан шешендікпен, қызықты да тартымды әңгімелегенін жи-

налған жұрт зейін қоя, сүйсініп тыңдады.

Т. Жаманқұловтың режиссурасымен қойылған ТОМИРИС спектаклін көруге академия ұжымы болып тамашалау ұйғарылды. Тұңғышбайдың күйшілік, әншілік өнерін жоғары бағалайтын қауым ол кісінің орындауында ән тыңдады. Қонағымыздың құрметіне арнап академияның күміс көмей

әншілері бірнеше ән айтып берді.

Кездесуді аяқтай келе, академия ректоры М.С.Нәрікбаев жеке өзінің атынан және академия ұжымы атынан Т.Жаманқұловқа ризашылық алғысын білдіріп, естелік ретінде академия эмблемасы басылған сувенир сағатты сыйға тартты.

Мәдениетті қолдау жылына орай сот-прокурорлық



факультеттің деканы Жұмахан Өтенов мырзаның ұйымдастырған кеші келешекте өзге факультеттер тарапынан қолдау тауып, өнер жұлдыздарымен кездесу заңды жалғасын табады деген ойдамыз.

**Тәрбие бөлімінің бастығы  
Амангелді Мұқан**